

Ufficio Stampa della Provincia autonoma di Trento
Piazza Dante 15, 38122 Trento
Tel. 0461 494614 - Fax 0461 494615
uff.stampa@provincia.tn.it

COMUNICATO n. 870 del 11/04/2025

Dokumentn, letrattn, piacher ober gor film ont audio-aunemmen

An projekt ver de katalogasion va sèll as galòt hòt der Giuseppe Šebesta

[Mòcheno] Der poemesch etnograf Giuseppe Šebesta (1919-2005) hòt s sai' gònz lem praucht za nemmen au informazonen as en lem ont as de gschicht van gamoaschèft van Alpn, der hòt zuaklaup vil material as ist kemmen praucht ver de konferenzn ont ver de publikasionen ont iberhaup za mòchen kennen de doing gamoa'schèft pet de musealisazion.

De vilsaitiket va bem as hòt s lem gem en Etnografischer museum va S.Michele, vinnt men sa gor en de dokumentasion as, en de leistn jarder van sai' lem, hòt er arschleng galòt en mearer instituzionen, provinzialeta ont extraprovinzialeta. Zbischn de doing ist gor naturlich der museo ka S.Michele, s Bersntoler Kulturinstitut ont de Fondazione Giovanni Angelini va Belluno.

Pet en zil za mòchen virtualet trèffen s sèll as der Giuseppe Šebesta galòt hòt ont za mòchen en òlla va der sai' òrbet eppes learnen, de Fondazione Angelini hòt envir tschoum en projekt: "La valle dei mòcheni nell'archivio di Giuseppe Šebesta, patrimonio per le Dolomiti delle giovani generazioni", ont hòt zua gariaft za tea' zòmmen òrbetn gor en Mets, en Bersntoler Kulturinstitut, de UMTS Ouberregiar van Kulturpahalter va der Autonom Provinz va Trea't, der Dipartiment va umanistische Studien ont van Kulturpahalter va der Università va Udine ont der Etnografischer Museum Dolomiti va der Provinz va Belluno.

Der projekt, as bart riven en schantònderer van 2026, hòt darbischt de zuazol va der Fondazione Caritro va Trea't ont Roveredo. S barn zòmmen òrbetn arkivistn as de doi òrbet tea' van a bail ont junga as nou learnen miasn, historiker, archeolong, geografn, museografn, registn, dokumentaristn, specialistn va der bersntolerisch-, trentinisch-, bellunisch- ont dolomitisch- kultur bou as der Giuseppe Šebesta hòt gaòrbetn.

Vil van materialn as de Instituzionen hom, kearn zua en de studien as der Giuseppe Šebesta hòt envir trong as en Bersntol. S sai' skearn, priaft, letrattn, kopien va dokumentn, originaleta dokumentn, audio- ont video-aunemmen ont film pet de sai'na pupi, as hòm en runt stolz gamòcht hearn.

(It)